



Ақмешіт

Аялаймын сені, Қызылорда!

27 қазан
бейсенбі
№85 (1889)
2022 жыл

Газет
1994 жылдың 15 сәуірінен
бастап шығады

• Қалалық қоғамдық-саяси әлеуметтік-
ақпараттық тарихи-танымдық газет •
E-mail: akmeshit.kz@mail.ru

апталығы

«БІР ТУДЫҢ АСТЫНДА»: ЫНТЫМАҚҚА ҰЙЫСТЫРҒАН АКЦИЯ



Ұлттық мереке – Республика күнінде Мемлекет басшысы Қасым-Жомарт Тоқаевтың қатысуымен «Ақорда» резиденциясының алдында Мемлекеттік ту көтеру рәсімі өтті.

«Бір тудың астында» атты жалпыұлттық патриоттар акциясына сыр-бойылықтар да қатысты.

«Рәміздер алаңы» аумағында өткен шараға 2000-нан аса тұрғын жиналды. Зиялы қауым өкілдері және аймақтық құқық қорғау органдарының басшылары, мемлекеттік қызметшілер, үкіметтік емес ұйым өкілдері белсенді жастар көпшілікті отаншылдық сезімге бөледі. Бір мезетте мемлекеттік рәмізіміз Туды көтеріп, әнұран шырқалды. Мұндай көрініс қала тұрғындарына патриоттық рух сыйлады.

Облыс әкімі Нұрлыбек Нәлібаев елордада бастау алған патриоттық акция Сыр елінде қолдау тапқанын атап өтіп, жерлестерді Республика күнімен құттықтады.

Патриоттық шарада мемлекеттік органдарға жаңадан жұмысқа қабылданған жас мемлекеттік қызметкерлер салтанатты түрде ант берді.

Ұлттық мерекеге арналған жиын патриоттық әндер мен авто, мото-шерумен аяқталды.

Республика күні қарсаңында аймақта бес бағытта түрлі мәдени шаралар ұйымдастырылды. Облыс, аудан орталықтарында түрлі әлеуметтік нысандар ашылып, ел игілігіне пайдалануға берілді.

«Ақмешіт-ақпарат»

■ МЕРЕЙЛІ ОТБАСЫ

Олар — республикалық байқау жеңімпазы

Республика күні қарсаңында отбасы құндылықтарын дәріптейтін «Мерейлі отбасы» байқауы өз мәресіне жетіп, жеңімпаздары марапатталды. Сыр өңірінен қатысқан Байжановтар отбасы республикалық конкурста жеңімпаз атанып, аймақ абыройын асқақтатты.



Қазіргі таңда отбасында өзара келісім мен рухани сыйластықты нығайту маңызды болып отыр. Бір шаңырақ астында берекелі өмір сүрудің маңыздылығын арттыру үлкен мәселеге айналды. Сондықтан да елімізде 2014 жылдан бері осындай өнегелі байқау жыл сайын ұйымдастырылып келеді.

Байжановтар әулетінің үлкені – 99 жастағы Сәрсенбек Байжанов 38 жылдан астам уақыт ұрпаққа ұстаздық қызмет жасаған. Сонымен қатар «II дәрежелі Ұлы Отан соғысы», «Қызыл Жұлдыз» ордендері, «Германияны жеңгені үшін», «Еңбек ардагері» медальдарымен марапатталған. Майдангер ұстаз «Шиелі ауданының құрметті азаматы» атағын да алған.

Құт қонған шаңырақта 11 бала, 38 немере, шөбере, 3 шөпшек өсіп, алып бәйтерекке айналған. Осылайша өнегелі

отбасы «Балалы үй – базар» бақытын көпке үлгі етіп келеді.

Биыл мерейлі шараға облыстан 178 отбасы қатысуға ниет білдірген. Жыл сайын үлгілі отбасылардың саны артып келеді. Республикалық байқауда жеңімпаз атанған Байжановтар отбасын облыс әкімі Нұрлыбек Нәлібаев құттықтады.

– «Ұяда не көрсен, ұшқанда соны ілесің» дейді дана халқымыз. Тағылымды тәрбиенің талбесігі отбасыдан қаланады. Бір-бірін бауыр деп мейір құшағында өсу, еңбекке жетелеп, жауапкершілікке жаттығу, досқа беріктік пен Отанға адалдық отбасының өнегелі дәстүрі. Сол дара дәстүрді дәріптеген Байжановтардың отбасы бағаланды, – деді аймақ басшысы.

Осындай үлгі тұтарлық мерейлі отбасылар көбейе түссе еліміздің іргесі сөгілмейтіні анық.

А.БАТЫРБАЙҚЫЗЫ

ҰЛТТЫҚ МЕРЕКЕДЕ 55 СӘБИ ДҮНИЕГЕ КЕЛДІ

Республика күнінде Сыр өңірінде
1 тәуліктің облыс бойынша
55 сәби дүниеге келді.
Олардың 38-і ұл, 17-сі қыз бала.

Облыс әкімінің орынбасары Нұрымбет Сақтағанов пен облыстық денсаулық сақтау басқармасының басшысы Сәбит Пазылов облыстық перинаталдық орталығында ұлттық мерекеде босаған жас аналарды құттықтады.

– Біз үшін ең бастысы – нәресте мен ана денсаулығының мықты болуы. Мереке күні дүниеге келген барлық сәбидің аман-сау болуымен қатар айтулы ел азаматы болып өсуіне тілектеспін. Қазақтың саны көп болсын! – деген ізгі тілегін жеткізді облыс әкімінің орынбасары Нұрымбет Сақтағанов.

Сондай-ақ әрбір анаға жаңа туған сәби күтіміне арналған қобдиша сыйлады.

Жас аналар оларға ризашылықтарын білдіріп, алғыстарын жеткізді. Қазіргі таңда сәбилер мен аналардың денсаулықтары жақсы.



Айта кетейік, мереке күні босаған жас аналарды құттықтау шарасы аудандарда да жалғасты.

■ ӘЗІМІЗДІҢ ӨНІМ

БҰРШАҚТЫ БИОЖЫЛЫТҚЫШ

Қала тұрғыны Жаңыл Иманқұлова бұршақты биожылтқыштың адам денсаулығына пайдасы мол екеніне көз жеткізді. Сосын ізденудің арқасында осы өнімді шығаруды қолға алды. Осылайша өз кәсібін бастап кеткен. Яғни, емдік қасиеті бар бұршақты биожылтқыш өнімін шығаруды қолға алды. Бұл өнім көпшілікке танымал болуы мүмкін. Сондықтан да кәсіпкерден бұршақты биожылтқыш өнімінің емдік қасиетін сұрағанды жөн көрдік.

– Бұршақты қыздырғыш дегеніміз – шығыс медицинасында, Қытайда ерте заманнан бері қолданылып келеді. Оны қазіргі уақытта да қолданылады. Табиғи жылтытқыштың пайдасы мол. Мен оны өз тәжірибемде сынап көрдім. Адамның бойында үш мыңнан аса нүкте болатын болса, соның ең маңызды өмірлік жеті нүктесін қатты тітіркендіру арқылы сырттан және ішкі органдарға жылу беру арқылы емдейді. Әрбір адамның ауруының түпкі себебі суықтан болады. Жылу қуаты азайған кезде дене мүшелері ауыра бастайды. Егер де біз аурудың себебін іздеп, сонымен күресетін болсақ, сол кезде тез жеңеміз. Қазіргі техниканың заманында қозғалыс аз. Қозғалыс кезінде ғана адамда қан айналым жақсарып, денсаулығы нығая түседі. Адам ағзасындағы жылу қуатын азайтып алмау керек. Бұған көмектесетін алатын ем – табиғи бұршақты биожылтқыш. Осыған қатты қызығып, іздену арқылы жасалу жолын таптым. Бұл сырты қатты мақталы матадан жасалады екен. Мақта ауаны еркін өткізеді, ішіндегі бұршақтың дымқылданып кетпеуіне көмектеседі. Матасы



адамның денесіне жайлы. Матаны Алматы қаласынан, ал бұршақты Қытайдан алдырмаймын. Бұл – «алдука» деп аталады. Алдуканың қасиеті табиғи жылуын адамға беріп, суықты өзіне тартады.

2 БЕТТЕ



ТҮРМЕДЕГІ ӨРТ ПЕН ӨЛІМ

Тегеранның солтүстігіндегі Эвин түрмесінде өрт шығып, бірнеше адам көз жұмды. Ресми мәлімет бойынша көз жұмғандардың барлығы түтінге уланған. Алайда желіде тараған бейнематериалдарда арнайы жасақтың оқ атқаны естілген. Осы мәселеге байланысты CNN тілшілері Артемис Моштагян мен Хира Хумаюн «Өрттен кейін жас ағызатын газ қолданған» атты мақала жазды.



«Tasnim» атты жергілікті басылымның мәліметінше, оқиға салдарынан сегіз адам көз жұмған. Негізінен бұл түрме саяси тұтқындардың қамау орны ретінде танымал. Мұнда соңғы он жылда басқарып келе жатқан ислам саясатына қарсы шыққандар қамалған.

Түрменің 62 жастағы тұтқыны Джафар Панахидін әйелі Тахере Сандидін айтуынша, түрмеде көзден жас ағызатын газ қолданылған. 62 жастағы режиссер түрмеге билікке қарсы шықты деген айыппен қамалған.

«Азаттық» радиосының Ирандағы филиалы «Фардаға» берген сұхбатында Саиди күйеуі қоңырау шалғанын және денсаулығы жақсы екенін айтты.

«1500tasvir» атты белсенді топ әлеуметтік желілерде жарияланған видеоларда оқ дауысы естілгенін және ирандық арнайы жасақтардың түрме орналасқан аймаққа қарай бет алғанын хабарлады. Ал реформаны қолдайтын IranWire басылымына түрмеден хабар түсіп, күзетшілер өрттен кейін түні бойы көзден жас ағызатын газ қолданғанын айтқан. Нәтижесінде тұтқындар тыныс алу үшін терезелерді сындыруға мәжбүр болған.

Көп тұтқынның адвокаты Мостафа Нили «Twitter»-де жазасын өтеушілердің көбі Тегераннан батысқа қарай 20 шақырым жерде орналасқан Раджаи Шахр түрмесіне ауыстырылғанын хабарлады. «IranWire» түсірген видеода Эвиннен тұтқындарды алып бара жатқан автобус көрсетілген. Ал түрмеде қайтыс болған 8 адамның барлығы ұрлық үшін қамалған.

Түрмедегі журналист Нилуфар Хами де сенбі күнгі өрттен кейін аман-есен. Бұл туралы күйеуі Мохаммад Хоссейн өз твиттерінде жазды. «Ол маған кеше түнде Эвинде не болғанын білмейтінін, бірақ ол қорқынышты дыбыстарды естігенін және қорқынышты оқиға болды деп ойлағанын айтты», – деді Мохаммад.

Тегеран прокуроры Әли Салехи «IRIB» мемлекеттік телеарнасында сөйлеген сөзінде түрмедегі «қақтығыстың» полиция бөлімшесінде болған жас әйелдің өлімінен кейін елде болған наразылықтармен байланысы жоғын айтты.

22 жастағы Махса Амини қыркүйек айында хиджабты дұрыс кимеген деген айыппен полиция ұстағаннан кейін қайтыс болды. Содан бері Иран билігі елдегі авторитарлық режимге наразылық білдірген демонстранттарды айыусыз қудалауды бастады.

Нью-Йоркте орналасқан Ирандағы адам құқықтары жөніндегі тәуелсіз орталықтың басшысы Хади Гаэми жексенбі күні «Twitter»-де: «Иранда бірде-бір тұтқын қауіпсіз емес. Онда адамдар мемлекетті сынағаны үшін мүгедек болып, өліп жатыр. Эвин мен Ирандағы саяси тұтқындар босатылуы керек. Барлық тұтқындар тісті медициналық көмекке және адвокатпен, отбасымен кездесуі керек», – деп жазды. Гаэми сондай-ақ БҰҰ-ны Иран басшыларын жауапқа тартуға шақырды.

Адам құқығы мәселесін көтеретін «Amnesty International» ұйымының бас хатшысы Калламард жексенбі күні «Twitter» парақшасында: «Иран халқына қарсы жасалған қылмыстардың тым көптігіне» сілтеме жасап, «БҰҰ-ның Иран үкіметі мен діни билігіне қарсы тергеу және жауап беру механизмін» құру үшін БҰҰ Адам құқықтары кеңесінің арнайы отырысын өткізуі қажет», – деп жазды.

4 БЕТТЕ

ӘЙЕЛДЕРДІҢ ЗЕЙНЕТКЕ ШЫҒУ ЖАСЫ БЕКІТІЛДІ

Қазақстан жұртын толғандырған мәселенің бірі – әйелдердің зейнет жасы. Жыл сайын 6 айдан қосылып келе жатқан жүйе бойынша бірте-бірте әйелдердің де зейнеткерлікке шығу жасын 63-ке дейін, яғни ерлермен теңестіру көзделген болатын. Саналы жұмырын еңбекпен қатар бала тәрбиесіне, отбасы шаруасына арнайтын әйел-аналарға ерлермен бірдей зейнетке шығу оңай емес. Бұл мәселе қоғам талқысына түссе де бірнеше жыл бойы 6 айдан қосу үрдісі жалғасып келген. Мемлекет басшысы әйел-аналарды 61 жаста зейнеткерлікке шығаруды ұсынған. Бұдан бөлек жас шеңберін 29 дан 35-ке дейін ұлғайту мәселесі көтерілген. Екі мәселе де Парламент Мәжілісінің жалпы отырысында қаралды.



Алдымен жастар жайын қозғайық. «Қазақстан Республикасының кейбір заңнамалық актілеріне мемлекеттік жастар саясаты мәселелері бойынша өзгерістер мен толықтырулар енгізу туралы» заң жобасы екінші оқылымда мақұлданды. Депутат Жәмилә Нұрманбетованың айтуынша, заң жобасы мемлекеттік жастар саясаты саласын жетілдіруге, қоғамдық қатынастарды кешенді реттеудің тиімді құқықтық негізін қалыптастыруға, жұмыспен қамтуды қамта-

масыз етуге, жастардың дамуына қолайлы жағдай жасауға бағытталған. «Қазақстан Республикасының кейбір заңнамалық актілеріне мемлекеттік жастар саясаты мәселелері бойынша өзгерістер мен толықтырулар енгізу туралы» Қазақстан Республикасы Заңының жобасы мемлекеттік жастар саясаты саласындағы заңнаманы жетілдіруге және жастардың құқықтары мен мүдделерін қорғауға бағытталған.

2 БЕТТЕ

Италияның Сардиния қаласында шахматтан әлем чемпионаты өтті. Ақсүйектер ойынында Сыр елінің аруы Әсел Серікбай 20 жасқа дейінгі қыздар арасында жүлделі II орын иеленді. Осылайша Әсел Қызылорда облысының тарихындағы тұңғыш гроссмейстер атанды.

СЫР АРУЫ — ГРОССМЕЙСТЕР!

Шахматшы арумыздың айтулы жеңісін сүйіншілеп облыс әкімі Нұрлыбек Нәлібаев фейсбук парақшасында құттықтап жазды. «Ұлттық мереке — Республика күні қарсаңында Италия елінде өткен Әлем чемпионатында жерлесіміз, жас шахматшы Әсел Серікбай гроссмейстер атағын қорғап шығып, аймақ жұртын қуанышқа бөледі. Чемпионатта Әсел Серікбай 58 мемлекеттен келген 186 спортшы арасында топ жарып, 20 жасқа дейінгі қыздар арасында күміс медаль алып, жүлде қоржынын толтырды.



Осылайша дарынды қызымыз Сыр өңірінен шыққан тұңғыш гроссмейстер ретінде тарихқа енді. Бұл елеулі жеңіс ұлттық мерекеге тамаша тарту болды!» — деп жазды аймақ басшысы. Облыс әкімі сондай-ақ құттықтау сөзінде Әселді жарысқа баптап, бағыт-бағдар берген жаттықтырушылары Василий Шимелков пен Риза Қошқароваға алғысын жеткізді. Жарыста 11 ойын өткізіп, жалпы есепте 8,5 ұпай жинаған шахматшы Әсел Серікбайды біз де жеңісімен шын жүректен құттықтап, күллі әлем мойындаған шахматшы атануын тілейміз!

ВЕЛОШАБАНДОЗ МАРАПАТ БИІГІНДЕ

19-23 қазан аралығында Кореяда велоспорттың маунтинбайк түрінен Азия чемпионаты өтті. Санчюн қаласында ұйымдастырылған сайысқа Қызылорда облысының велошабандозы да қатысты. Төрт күндік дүбірлі додада Сыр елінің аруы Алина Саркулова бірнеше жүлдені қанжығаға байлап қайтты.

Азия чемпионатының қорытындысымен Алина Саркулова екі алтын мен бір қола медаль иегері атанды. Кросс кантри олимпик бағдарламасы бойынша ол III орын иеленді. Ал кросс кантри эстафета мен кросс кантри элементар бағдарламасында Алина оқ бойы озық болып, жарыстың жеңімпазы атанды. Осылайша веложарыстың Азия чемпионатында Алина аруымыз Сыр елінің қоржынына бірден үш медаль салды.



BBC NEWS

РЕСЕЙ-УКРАИНА: ИНФРАҚҰРЫЛЫМҒА ШАБУЫЛ

Украинаның ресми өкілдері Ресей жасаған «терактінің» әсерінен мыңдаған аумақ электр энергиясыз қалғанын мәлімдеді. 7 қазаннан бергі ұйымдастырылған шабуылдың әсерінен елде шамамен 70-тен астам адам көз жұмған. Украинадағы ахуал туралы BBC ариасында Хьюго Бачега мен Ярослав Луковтін «Украинадағы соғыс: Ресей соққысынан кейін 1162 қала мен ауылда электр энергиясы өшті» тақырыбында мақала жарық көрді.



Украина президенті Владимир Зеленский соңғы сегіз күнде Украинадағы электр станцияларының 30 проценті қирағанын айтты. Сейсенбідегі соққылардың әсерінен Киевтегі кейбір шағын аудан жарықсыз, ауыз суыз қалған.

Киев мэрі Виталий Кличко Ресей соққысының құрбандарының үшеуі де «өте маңызды инфрақұрылым» жұмысшылары екенін айтып, елордадағы екі нысан зардап шеккенін мәлімдеді. Ел астанасының батысындағы Житомирде электр жарығы мен су үзіліп, Днепрдің оңтүстік-шығысында бір энергетикалық нысан зардап шеккен.

Сейсенбі күні Киевте өткен брифингте 7-18 қазан аралығында энергетикалық нысандарды атқылау салдарынан Украинаның 11 аймағындағы 4000-ға жуық елді мекеннің байланысы үзілгені айтылды. «Қазіргі уақытта энергетика министрлігінің мәліметінше, 1162 елді мекен жарықсыз қалды», — деді елдің төтенше жағдайлар министрлігінің өкілі.

Ұрыс даласында ауыр жеңілістерге ұшырағаннан кейін Ресей соңғы аптада майдан шебінен алыс қалалардағы электр инфрақұрылымына шабуылды күшейтті.

Президент аппараты жетекшісінің орынбасары Кирилл Тимошенко: «Біріншіден, электр қуатын үнемдеуге барлығы дайын болуы керек, екіншіден, шабуыл жалғаса берсе электр жарығы тұрақты түрде өшуі мүмкін. Сол себептен барлығы қытмыр қысқа дайындалуы керек», — деді. Одан бөлек украиналықтарға жергілікті уақыт бойынша күн сайын 07:00-ден 09:00-ге дейін электр құралдарын қолданбау туралы ескерту жасады. Кейбір қалаларда украиндықтар электр генераторлары мен газ қыздырғыштарын сатып алуда.

Одан бөлек Украинаның мемлекеттік атом энергетикалық компаниясы Мәскеуді Запорожьедегі атом электр станциясында екі жоғары лауазымды шенеунікті тұтқыңа алды деп айыптады. Еуропадағы ең ірі зауытты Ресей әскерлері басып алса да украиндық қызметкерлері ауыр жағдайда жұмыс істеуді жалғастыруда.

«Біз Ресейдің энергетикалық және азаматтық инфрақұрылымға шабуылдарын күшейтіп, күзге қарай қалалардағы шайқастарды күшейтеді деп күткен едік — дәл солай болды», — деді депутат Леся Василенко ВВС-ге берген сұхбатында.

Сонымен қатар соңғы уақытта зерттеушілер Ресей шетелдік ракеталарды, соның ішінде ирандық қаруды қолданып жатқанын анықтады. АҚШ пен Еуроодақ Ресейге қарулық көмек берген елдер БҰҰ-ның қауіпсіздік келісіміне нұқсан келтіретінін және санкцияға ұшырайтынын мәлімдеді.

Алайда Иран да, Ресей де ешқандай шетелдік ракета қолданылмағанын айтты. Дегенмен Украинадағы батыс шенеуніктері «Ұшқышсыз ұшақтардың Ираннан келгеніне күмән жоқ және Ресейдің электр желісіне шабуыл жасауға тырысып жатқаны анық», — деп мәлімдеді.

Украина сыртқы істер министрі Дмитрий Кулеба президент Зеленскийден Тегеранмен дипломатиялық қарым-қатынасты үзуді сұрайтынын айтты. Сондай-ақ ол Израильге әуе шабуылына қарсы қорғаныс құралдарын тез арада жеткізуге шақыратын ресми хабар жіберілетінін айтты.

Алайда Израиль шенеуніктері әзірге Киевке қару жіберуден тартыншақтап отыр. Ресейдегі қауіпсіздік шенеуніктерінің бірі Дмитрий Медведев Израиль қару жіберсе Мәскеумен қарым-қатынас бұзылатынын ескерткен еді.

Түпнұсқадан аударып, шолу жасаған
Аслан ЖАЙҚОНЫСҰЛЫ

ЖЕЛАЯҚ МЕЙІРЖАН МЕН МЕРГЕН ҚОЛҒАНАТ



Өзбекстан астанасы Ташкентте өткен пара атлетикадан ҚР Ұлттық Паралимпиада құрамасы Өзбекстан Республикасының Пара атлетикадан ашық чемпионатына қатысты. Қазақстан атынан шыққан спортшылардың арасында жерлесіміз де бар.

Қазақстан Республикасы құрамасының сапындағы Қызылорда облысының параспортшылары Мейіржан Мақшат пен Қолғанат

Бакберген жарыста жақсы нәтижеге қол жеткізе алды. Мәселен, желаяқ Мейіржан 400 метр қашықтыққа жүгіруде II орын иегері атанды. Ал халықаралық дәрежедегі спорт шебері Қолғанат Бакберген найза лақтырудан III орынды жеңіп алды. Спортшыларды жарысқа Қазақстан Республикасының еңбек сіңірген жаттықтырушысы Юрий Моисеев дайындады. Одан бөлек бұл жарыс қарашада Португалияда ұйымдастырылатын Дүниежүзілік «IWAS-2022» дайындық ретінде өтті.



ГОЛОВКИННІҢ КЕЛЕСІ ҚАРСЫЛАСЫ КІМ?

Төрткүл дүние көз тіккен трилогия тәмам. Головкин мен Альварестің текетіресі «Канелонның» есебіне жазылды. Ендігі кезекте IBF және WBA басшылығы Геннадий Головкиннің келесі қарсыласын анықтады.

Қазіргі кезде спортшымыз Геннадий Головкиннің IBF және WBA тұжырымдары бойынша орта салмақтағы әлем чемпионы атағы бар. Негізгі GGG-дің кезекті қарсыласы кубалық Эрисланди Лара еді. Бірақ қазақстандық былғары қолғап шебері титулдарын бразилиялық Эскива Фалькаоға қарсы жекпе-жекте қорғауға міндетті.

Жалпы бразилиялық боксшы Эскива Фалькаоның нокаутер атағы бар. Ол кәсіби мансабында 30 жекпе-жек өткізіп, 20-сын нокаутпен аяқтаған. Головкиннің бұл қарсыласы туралы және алдағы жекпе-жек жайлы талқылағандар қатары күн санап артып келеді. Бірі бұл кездесуде нокаут болатынын айтса, өзгесі жекпе-жекте кімнің жеңіске жететіні туралы ойын ортаға салды.

«Мен бұл мүмкіндікті көп күттім және бұдан айырылуға жол бермеймін. Головкин Эрисланди Лараға емес, Эскива Фалькаоға қарсы жекпе-жек өткізеді!» — деп жазды Головкиннің бразилиялық қарсыласы. Сондай-ақ Фалькао



GGG-дің фанаты екенін де жасырмады. «GGG өте керемет жігіт, тәжірибелі спорт аңызы. Мен бәсекелестікке қарамастан оның жанкүйерімін. Ол қауіпті жігіт, оның соққылары жойқын және нокаутқа құлату ықтималдығы жоғары. Алайда қазір ол 40 жаста және соған сай рингте аздап қиындыққа тап болады. Головкинде бұрынғыдай реакция, жылдамдық жоқ, кейбір қарсы шабуылдарда сәтсіздікке ұшырайды. Ал менің жасым 32-де. Сондықтан менің уақытым келді деп ойлаймын. Ол бұдан 10 жыл бұрынғы Головкин емес. Қарсы шабуылға оның енді реакциясы жоқ. Менің ойымша, ол баяу төменге сырғып жатыр», — деді Фалькао.

Эскива Фалькаоның менеджері Серхио Батарелли WBA және IBF-тен өз спортшысының орта салмақтағы әлем титулының қазіргі иегерімен жекпе-жегін тағайындау туралы хабарлама алғанын растады. Шарт бойынша жекпе-жек 120 күн ішінде өтуі керек, ал оның жеңімпазы WBA нұсқасы бойынша орта салмақтағы әлем чемпионы Эрисланди Ларамен жұдырықтасуға міндетті.

«Екі командаға келесі жылдың басында жекпе-жек өткізу үшін келіссөздерді бастау туралы бұйрық келді. Менің ойымша, бұл сайыс 2023 жылдың ақпан немесе наурыз айында болады. Күні мен орны келіссөздерге байланысты», — деді бразилиялық боксшының промоутері.

Футболдан Қазақстан ұлттық құрамасының жартылай қорғаушысы Бақтияр Зайнутдинов алдағы уақытта мансабын Италияда жалғастыруы мүмкін. Бүгінде ресейлік ЦСКА футбол командасында ойнап жүрген ала доп шебері туралы «А сериясында ойнауы мүмкін» деген ақпарат тарайды.

ЗАЙНУТДИНОВ ИТАЛИЯДА ДОП ТЕБЕ МЕ?

Бұл жаңалыққа қазақ футболшының жанкүйерлері қуанғаны рас. Себебі қазақ баласының еуропалық клуб сапында өнер көрсетуі мақтанш болары анық. Бірақ футболшының агенті Евгений Новиков «Спорт Экспресс» басылымына берген пікірінде бұл ақпаратты жоққа шығарды. «Зайнутдинов А сериясындағы клубтардың біріне ауыспа? Бұл ақпараттың қайдан шыққанын білмеймін! ЦСКА-мен ешқандай келісім жоқ!» — деді Новиков.

Алайда «Sports.kz» украиналық менеджер Алекс Великихтен Зайнутдиновтің Италияға кетуі туралы болжамдарын сұрап білді. Шетелдік жобаларды үйлестіру және Италиядан, Шығыс және Солтүстік Еуропадан дарынды футболшыларды іздеу және А сериясының әртүрлі клубымен скаутинг жүргізетін маман өз ойымен бөлісті. «Біріншіден, италиялық нарық үшін ЦСКА-ның трансфер мәселелері бойынша жұмыс жүйесі түсінікті, жақсы қалыптасқан және сәйкесінше, сырттан келетін басқа адамдар көп емес, тек соңғы үш жылда бизнеспен айналысатындар ғана бар. Екіншіден, бұл ойыншы екі жыл бұрын италиялық нарықты қызықтыра білді, бірақ кейін бағасы жоғары болды. Үшіншіден, футболшы жартылай қорғауға ойнау үшін пайдалы. Оның бағасы 3 миллион еуроны және бонустарды құрауы мүмкін немесе сатып алу құқығымен арендаға беріледі. Көп нәрсе ойыншының өзіне байланысты», — деді Великих. Сондай-ақ сарапшы Зайнутдиновтің А сериясында жақсы өнер көрсете алатынына сенетінін де тілге тиек етті.

Бетті дайындаған **Аслан НҰРАЗҒАЛИ**
Суреттер ашық дереккөзден алынды



Меншік несі:

СЫР МЕДИА
жауапкершілігі
шектеулі серіктестігі

Бас директор
Аманжол ОҢҒАРБАЕВ

Қызылорда қалалық «Ақмешіт
апталығы» газетінің редакциясы

Бас редактор
Азиз БАТЫРБЕКОВ

Телефондар:

Бас директор - 40-11-10, 70-11-36 (факс)
Бас редактор - 40-11-10 (ішкі нөмір — 1009)
Қабылдау бөлмесі - 40-11-10 (ішкі нөмір — 1023)
Бас редактордың орынбасары - 40-11-10 (ішкі нөмір — 1022)
Жауапты хатшы, бөлімдер - 40-11-10 (ішкі нөмір — 1013, 1018, 1021)

Газеттің негізін қалаған **Әділхан БӨЙМЕН**

Мекен-жайымыз: 120008, Қызылорда қаласы, Бейбарыс Сұлтан көшесі, 4. Т.Жүргенов атындағы Шығармашылық үйі.

Газет Қазақстан Республикасы Ақпарат және коммуникациялар министрлігі Ақпарат комитетінде 2019 жылдың 16 сәуірінде қайта тіркелген. Тіркеу куәлігі №17657-І. «Ақмешіт апталығы» қалалық газеті ҚР СТ ISO 9001:2016 (ISO 9001:2015) «Сапа менеджменті жүйелері» талаптарына сәйкес КЗ. 4310318.07.03.01178 нөмірімен сертификатталған. Аптасына 2 рет, сейсенбі, сенбі күндері шығады.

Жарияланған материалдардағы пікірлер редакция көзқарасымен сәйкес келе бермейтіндігі, деректер мен мәліметтердің нақтылығына автордың, хабарландыру иесінің жауапты екендігі ескертіледі.

Жарнама мазмұнына жарнама беруші жауапты.

Газет редакцияның компьютер орталығында теріліп, беттеліп, «ASU» баспа үйі» ЖШС сенімгерлік басқаруындағы «Сыр медиа» ЖШС баспаханасында басылады. Тел: 8(7242) 40-06-68

Газеттің таралымы бойынша 70-14-08 телефонына хабарласуға болады.

Қызылорда қаласы, Бейбарыс Сұлтан көшесі 4 А.
Таралымы 3737 Таспырыс №1800

Нөмірдің кезекші редакторы Аслан НҰРАЗҒАЛИ